

HARI RAYA

0RANG-ORANG ARAB DI DALAM JAHILIYAH DAN ISLAM

oleh: Mahar Affendi

Sebelum saya memulakan makalah saya yang bertajuk di atas, terlebih dahulu saya suka memberi setinggi-tinggi ucapan tahniah kepada tuan penerbit majalah ini, yang telah tekun berusaha dengan hati yang cekal, tinggi hemah, kuat iradat, luas cita-cita. Tiada tahu penat dan lelah kerana menciptakan cita-citanya yang mulia itu hingga dapat diterbitkan majalah yang tunggal ini, yang akan diciptanya dengan alat cetaknya sendiri dengan mengambil sempena keluaran bilangan majalah yang pertama pada Hari Raya Aidil Fitri yang mulia, hari kesukaan, hari kerehatan, hari kesyukuran umat Islam seluruh dunia. Mudah-mudahan dengan adanya majalah yang seumpama ini bertambah lampu suluh yang menerangi umat Islam Melayu khasnya yang sedang mengembara menuju kepada kemajuan, kepada ilmu pengetahuan dan kemakmuran.

Tuan-tuan pembaca lebih maklum bahawa sebarang umat atau bangsa di dalam dunia ini ada mempunyai hari kebesaran dan hari kesukaan yang dinamakan Hari Raya. Tuhan tidak menjadikan sesuatu bangsa melainkan ditakdirkan beberapa hari dalam setahun untuk bangsa-bangsa itu berehat, bersuka ria, menghilangkan kepenatan dan kegelisahan hidup. Bangsa-bangsa yang mengerti cara hidup merekalah yang lebih menghargakan Hari Raya itu dan menggunakan pada tempatnya dan pada yang sewajibnya, kerana atas sekadar mereka mengambil kerehatan, mengambil nafas daripada udara yang jernih tenang-lenang, mengambil kesempatan akan nikmat Hari Raya itu sebeginutlah mereka terlena daripada kepenatan berkerja, berjuang memikul tanggungan dan melaksanakannya dan dapatlah mereka bersedia persiapan untuk kehidupan

masa akan datang apakala telah pulih semula kekuatan tubuh badan, kencang iradat, cergas gerak-geri, tajam fikiran, boleh menempuh dan menentang segala rintangan hidup melalui segala bahaya malapetaka terus maju mempelopori medan perjuangan yang tiada bersempadan dan berhingga itu.

Dari sebab itu orang-orang Arab yang mendiami padang pasir, susah pencarian hidup, terpaksa menggunakan sebesar-besarnya tenaga dan kerap kali menempuh perjuangan kerana hendak hidup mereka sangat-sangat mengambil berat kepada Hari Raya, sentiasa ternanti-nanti dan menghitung-hitung bilakah Hari Raya itu tiba?! Samada golongan bangsawan, hartawan dan rendah, laki-laki perempuan, tua muda semuanya sangat cinta kepada Hari Raya dan tertunggu-tunggu.

Orang-orang Arab dalam Jahiliyah ada mempunyai dua macam Hari Raya di dalam setahun iaitu Hari Raya Agama dan Hari Raya Kebangsaan. Adapun Hari Raya Agama ada bermacam-macam menurut bermacam-macamnya akidah agama dan mazhab mereka. Orang-orang Arab sebagaimana sudah termaklum adalah suatu bangsa yang mempunyai khayal yang luas lagi subur, maka khayal itu telah menakluk akal fikiran mereka dari sebab itu terjadilah beberapa akidah, beberapa mazhab yang bermacam-macam, mereka itu ada yang menyembah berhala, ada yang beragama Majusi sebagaimana orang-orang Parsi menyembah api dan binatang, dan ada yang menyembah pokok kurma dan pohon-pohon kayu, dan beragama Yahudi dan Nasrani, ada yang keluar daripada segala mazhab dan agama itu zindik dan menceroboh segala akidah-akidah. Sedikit benar daripada mereka yang beriktiad meng-Esa-kan Tuhan, dari sebab itu jadilah Hari Raya orang-orang Arab itu

bermacam-macam dan berlain-lain rupa keadaannya.

Orang-orang Arab yang menyembah beberapa berhala, tiap-tiap satu berhala itu satu pula Hari Rayanya. Mereka pada hari itu berkumpul di tempat berhala-berhala itu, di sana mereka sepanjang hari sampai malam makan minum, dan di situ diadakan permainan-permainan dan keramaian-keramaian daripada permainan-permainan dan keramaian-keramaian yang diutamakan mereka ialah keramaian bermain lumba kuda dan tarinya, keramaian perhimpunan pujangga dan jaguh-jaguh ahli bersyair, berqasidah-qasidah dan berpidato. Keramaian bermain judi dan mengurniakan keuntungan judi kepada orang susah dan sengsara.

Hal mereka itu apabila hendak mengadakan keramaian mainan judi itu mereka membeli seekor unta tetapi harga unta itu tiada dibayar ketika itu melainkan apabila telah habis permainan. Unta itu disembelih dan dibahagi kepada sepuluh bahagian kemudian dibawa sepuluh *qidah* (sepuluh batang kayu seperti tongkat penarik kira-kira sejengkal yang diperbuat daripada dahan kayu) tujuh daripadanya beralamat dan tiga tiada beralamat. Tujuh *qidah* yang beralamat itu ada yang alamatnya satu dinamakan (*Fadz*) dan alamat dua dinamakan (*Tuam*) yang beralamat tiga dinamakan (*Raqib*) yang beralamat empat dinamakan (*Halas*) yang beralamat lima dinamakan (*Nafas*) yang beralamat enam dinamakan (*Misbil*) yang beralamat tujuh dinamakan (*Mu'alla*) dan yang ketiga lagi tiada beralamat hanya untuk mencukupkan bilangan sepuluh. Menang kalah permainan itu menurut kadar bilangan alamat itu, misalnya jika menang atau kalah dengan (*Fadz*) dapat satu atau rugi, demikianlah seterusnya hingga sampai kepada (*Mu'alla*) iaitu jika menang atau kalah dapat tujuh bahagian atau rugi tujuh bahagian misalan seperti di bawah ini:-

Tampil ke hadapan tujuh orang ahli pemain dan seorang pengadil yang amanah, kemudian diberikan kepada pengadil itu sepuluh *qidah* di dalam suatu tabung daripada kulit yang

tiada boleh kelihatan alamat *qidah* itu, kemudian tiap-tiap seorang ahli pemain itu memilih satu *qidah* yang diundinya dengan mengaku jika menang atau kalah atas pilihannya dengan tiada berhenti mengeluarkan *qidah* daripada dalam tabung itu lepas satu, satu dengan menyebutkan nama orang yang memilihnya dengan tiada berhak mengeluarkan *qidah* yang menang sehingga habis sepuluh bahagian daging unta tadi. Apabila telah habis maka *qidah* yang belum dicabut itu dikira kalah dan kekalahannya atas kadar banyak alamat *qidah* itu.

Misalnya apabila dicabut keluar *Mu'alla* yakni tujuh alamatnya, kemudian dicabut lagi keluar *Raqib* yakni tiga alamatnya maka orang yang pertama itu menang tujuh bahagian dan yang kedua menang tiga bahagian jumlahnya sepuluh bahagian iaitu jumlah bahagian daging unta. Maka orang yang belum mencabut *qidah* dikira kalah kerana bahagian sudah habis. Tiap-tiap seorang mencabut *qidah* yang kalah memberi harga unta atas kadar alamat *qidahnya*. Sekiranya harga unta itu sepuluh dinar maka kenalah orang yang mempunyai (*Fadz*) satu dinar (*Tuam*) dua dinar (*Halas*) empat dinar (*Nafas*) lima dinar (*Misbil*) enam dinar, segala keuntungan dan kerugian itu diberikan kepada orang-orang miskin dan sengsara. Jika seseorang memberi kaum keluarganya daripada keuntungan judi itu adalah sebesar-besar aib, dan lagi suatu kepayahan kepada mereka atas orang yang menonton permainan itu tiada mengikut bersama main.

Inilah setengah keramaian Hari Raya orang-orang Arab yang menyembah berhala. Adapun orang-orang Arab yang lain seperti Arab Majusi yang mengikut orang Parsi, sebesar-besar Hari Raya mereka iaitu Hari Raya Neruz dan Mahrajan. Neruz maknanya hari baru iaitu Hari Raya Awal Tahun bagi orang Parsi iaitu pada awal musim bunga lamanya tujuh hari tidak ada selebih-lebih ramai dan riuh-rendah di seluruh negeri Parsi dan Iraq lain daripada Hari Raya Neruz itu.

Adat orang-orang Parsi pada malam pertama Hari Raya Neruz

itu datang seorang lelaki-lelaki cantik remaja, baik nama, mulia gelaran, berpakaian dan perhiasan yang molek berdiri di pintu istana raja, apabila waktu subuh ia masuk ke dalam majlis raja itu dengan tidak minta izin terlebih dahulu ketika raja sedang duduk di tengah majlis yang hebat dan indah maka raja itu bertitah kepada lelaki itu, engkau siapa, dari mana engkau datang, apa hajat engkau, kenapa engkau datang, apa ada pada engkau? Lelaki itu menjawab, patik Mansur (orang yang menang yang ditolong) nama patik Mubarak (yang diberkati) datang daripada pihak Tuhan, mendapatkan raja yang berbahagia berkeselamatan tenang-lenang bersama-sama patik tahun baru. Kemudian daripada itu ia duduk, lepas daripada itu datang pula seorang lelaki membawa dulang daripada perak di dalamnya benih gandum beras, dan bermacam-macam biji-bijian daripada tiap-tiap satu jenis, tujuh tangkai dan tujuh biji, seketul gula, satu dinar dan satu dirham duit baru lalu disembahkan kepada raja. Kemudian daripada itu disembahkan kepada baginda hadiah-hadiah dan kemudian dibenarkan orang-orang mengadap menurut tatatertib pangkat jawatan dan gelaran masing-masing. Kemudian disembahkan satu roti besar yang diperbuat daripada biji-bijian tadi lalu dijamah oleh baginda memberi makan kepada orang-orang yang hadir di majlis itu seraya bertitah: Ini hari baru daripada bulan baru, tahun dan masa baru, kita berhajat kepada membaharu segala yang ada di dalam lingkungan zaman, kemudian raja itu mengurniakan hadiah-hadiah yang disembahkan kepada baginda tadi kepada orang-orang yang hadir.

Pada malam Hari Raya itu orang-orang ramai sibuk menyalaikan api dan lampu di tanah-tanah lembah, di atas gunung-ganang di hadapan rumah sehingga terkhayal kepada barangsiapa melihat negeri Parsi dari jauh nampak akan cahaya api terang-benderang menerangi ufuk negeri Parsi dan sekelilingnya. Apabila waktu Subuh nyala api itu padam maka orang ramai itu merenjis tanah mereka dengan air dan orang-orang kaya

merenjis dengan air bercampur air mawar. Apabila telah selesai mereka pun menghabiskan Hari Raya itu bersuka ria mengadakan keramaian makan minum bersenang-senang dan lainnya.

Adapun Hari Raya Mahrajan waktunya pada pertengahan musim *autumn* (musim lepas musim panas) lamanya enam hari juga. Orang-orang Parsi pada malam Hari Raya Mahrajan itu menyapu badan mereka dengan minyak *al-ban* (minyak yang dikeluarkan daripada buah kayu baunya wangi) kerana mengambil berkat, sama ada raja, bangsawan, dan orang-orang kebanyakan semuanya menyapu badan mereka dengan minyak itu. Apabila waktu Subuh masuklah ketua agama mereka mengadap baginda raja, membawa dulang di dalamnya buah *Atar jah* (warnanya kemerah-merahan, sedap rasanya, wangi baunya) buah jambu, buah anggur, epal, seketul gula. Kemudian daripada itu baharu dipersilakan pegawai-pegawai orang besar-besar mengadap menurut darjat pangkat masing-masing membawa dulang seperti yang disebutkan tadi. Pada Hari Raya Neruz dan Mahrajan orang-orang Parsi hadiah-menghadiah barang-barang dan bau-bauan seperti ambar, kasturi zafran, dan kapur dan lain-lain.

Inilah saya gambarkan dengan ringkas akan Hari Raya agama orang-orang Arab Jahiliah dan Parsi. Adapun Hari Raya Kebangsaan orang-orang Arab kebanyakan dijadikan daripada hari kerana memperingati kemenangan dalam perjuangan atau sesuatu hari yang berperistiwa, pada hari itu mereka menyembah barang-barang makanan, minuman-minuman dan alat perhiasan kepada berhala-berhala dan dekat berhala itu mereka menyembelih unta berjamu makan minum ucap-mengucap tahniah di antara satu sama lain.

Maka tempat Kaabah berdiri dan di kawasannya yang penuh di sekeliling Kaabah itu dengan berhala kabilah-kabilah Arab adalah menarik perhatian orang-orang Arab maka apabila telah selesai orang-orang Arab itu daripada mengerjakan haji mereka pergi ke Kaabah tempat berhala itu menunaikan korban iaitulah kemegahan mereka.

Tiap-tiap satu berhala itu khadam penunggunya, pada hari itu riuh rendah mereka dengan kesukaan dan keriangan, negeri Mekah dalam sepanjang bulan Zulkaedah dan Zulhijjah bolehlah dikatakan Hari Raya – Hari Raya lelaki perempuan daripada orang-orang kabilah Arab memakai pakaian dan perhiasan baharu belaka. Demikianlah keadaan orang-orang Arab di Mekah. Adapun orang-orang Arab di negeri Yaman di sana ada juga rumah berhala yang dinamakan Kaabah Yaman yang di dalamnya ada berhala maka apabila sampai Hari Raya mereka hiasi rumah berhala itu dengan bunga-bunga dan perhiasan-perhiasan dan menaruhkan telur-telur burung unta, membawa lembu unta mereka sembelih di situ. Orang-orang Arab negeri Najran di Yaman menyembah pokok kurma pada Hari Raya mereka hiasi pokok itu dengan perhiasan-perhiasan yang bercahaya-bercahaya dan keluarlah perempuan-perempuan bersorak menyanyi sambil menari dan kanak-kanak berduyun-berduyun menderu ke tempat-tempat permainan dan keramaian menyanyikan nasyid-nasyid dan bergendang. Pemuda-pemuda lelaki berqasidah berlawan-lawan mengeluarkan kepandaian masing-masing.

Apabila zahir agama Islam yang dibawa oleh junjungan kita Nabi Muhammad sallallahu alaihi wasalam maka pada ketika Rasullullah sallallahu alaihi wasalam sampai ke Madinah, baginda dapati orang-orang Madinah ada melakukan syiar-syiar Hari Raya Neruz dan Mahrajan. Sabda baginda kepada mereka itu, “apa ini dua Hari Raya? Kami bermain bersuka ria pada dua hari raya itu pada zaman Jahiliah, jawab mereka. Sabda Rasullullah, “Allah Taala telah mengantikan bagi kamu lebih baik daripada dua hari raya itu, Hari Raya Fitrah dan Hari Raya Aidil Adha.

Rasullullah sallallahu alaihi wasalam mengatur orang-orang Islam lelaki perempuan tua muda pada pagi Hari Raya itu pergi ke Masjid Haram dengan tiada tertinggal seorang lelaki atau perempuan, tua dan muda serta sekalian kanak-kanak berarak dengan teratur berjalan menuju ke Masjid Haram kerana sembahyang

Hari Raya kemudian balik lepas sembahyang melalui jalan lain supaya dilihat orang lain akan kekuatan persatuan orang Islam dan orang-orang Islam pada hari itu diperintah membersihkan diri, pakaian, memakai bau-bau dan bermaaf-maafan, berjumpa satu sama lain dengan bersih hati dan badan.

Sembahyang Hari Raya Fitrah berjemaah kemudian telah sebulan orang Islam puasa adalah sangat besar hikmahnya yang membawa orang-orang Islam kepada mahabbah persatuan. Zakat fitrah pada Hari Raya itu dikurniakan kepada orang-orang fakir miskin maka hilanglah dahaga kelaparan orang-orang fakir miskin itu dengan yang demikian lenyaplah keluh kesah hati fakir miskin menghulurkan tangannya berjabat salam dengan saudara-saudaranya orang-orang Islam seolah-olah antara kedua orang serumah, seberapa seibu. Pada Hari Raya Fitrah itu beruntunglah orang-orang Islam mendapat pahala puasa dan pahala kemurahan, melepaskan orang-orang fakir miskin daripada kuku kesusahan dan kesengsaraan melihat anak-anaknya berpakaian cobak-cabik dan telanjang bogel yang memutuskan jantung hati ibu bapa yang miskin melihat anak-anak jirannya memakai perhiasan-perhiasan dan permainan-permainan kenaikan makan angin ke sana sini dengan suka ria maka dengan mengeluarkan zakat fitrah, dibahagikan kepada fakir miskin pada hari itu sangatlah besar faedahnya iaitu sebagai suguhati dan penawar kesusahan dan kesedihan yang dideritai oleh fakir miskin. Dengan zakat fitrah itu tertambatlah hati fakir miskin kepada orang-orang kaya dan orang-orang yang mampu di sekeliling mereka dengan sebab dapatlah mengubahkan perangai orang-orang Arab Jahiliah yang sentiasa berperang sesama sendiri melenyapkan beribu-ribu jiwa, merosakkan harta benda yang pada ghalibnya dengan sebab kepapaan, kelaparan dan orang lain kaya melangit.

Jika kita halusi asal punca huru-hara dunia hari ini nescaya kita dapat ialah daripada perbezaan kehidupan yang terlampau di antara orang-orang kaya dengan orang-orang

misik umpamanya orang kaya mempunyai istana-istana mahligai-mahligai, mempunyai kuda lumba, anjing yang memakan makanan dan perbelanjaan berlipat ganda daripada kehidupan seorang misikin, kuda, anjing dapat layanan dan tempat kediaman yang bagus, bersih dan ubat doktor makan bagus, tetapi orang fakir bertikar tanah, berlampa bintang, copak-capik kain baju, perutnya keroncong tiada mendapat layanan yang cukup bahkan terkadang menerima penghinaan daripada mereka itu. Oleh sebab menjaga perhubungan baik antara orang kaya dan fakir misikin ini agama Islam mewajibkan atas orang kaya mengeluarkan zakat hartanya dan jika enggan menunaikannya mengharuskan dengan kekerasan pada pemungut zakat itu diuntukkan bahagian orang fakir misikin yang mendatangkan maslahat kepada diri orang-orang kaya dan maslahat am yang membawa kepada kesentosaan dan keamanan.

Agaknya setengah kerajaan Barat sekarang telah tertarik kepada hikmah zakat dan faedah-faedah yang besar itu lalu mereka mengadakan peraturan dan undang-undang cukai pendapatan supaya dapat setimbang di antara orang kaya dan fakir misikin. Pendek kata, Hari Raya dalam Islam ada mengandung hikmah dan maslahat umat Islam bukan hanya rehat bersuka ria dan keramaian sahaja tetapi lebih jauh daripada itu mengatur kehidupan manusia. Demikian juga hikmah hari raya Haji dalam Islam sangat besar faedahnya kepada persatuan umat Islam yang bermacam-macam bangsa di seluruh dunia berada di padang Arafah mengadap kepada Tuhan yang satu, peraturan ibadah yang satu yang penuh dengan hikmah-hikmah yang besar yang lebih luas dan sempurna daripada perikatan dan persatuan bangsa-bangsa bersatu yang diperbuat oleh segala bangsa dunia sekarang.

Umat Melayu pada masa ini mengaku kelemahan di dalam serba serbi tetapi kelemahan itu dapat diperbaiki dengan tidak payah memusingkan kepala berfikir. Pembaca-pembaca tentu hairan dan bertanya kepada saya bagaimana jalannya saya

menjawab dengan jalan agama. Iaitu saya syorkan pada Hari Raya Haji akan datang sekalian umat-umat Islam di dalam Semenanjung Tanah Melayu berikrar menderma tiap-tiap seorang seringgit. Penduduk Semenanjung lebih daripada dua *million* setengah, apakah tidak dapat se-*million* orang yang boleh berderma tiap-tiap seorang seringgit. Jadikanlah derma tuan-tuan itu seolah-olah zakat fitrah tuan-tuan seumur hidup sekali, kebetulan wang itu dikawal oleh satu badan. Wang itu dinilaikan tanah rumah sewa, atau membuat perniagaan. Ini senang boleh dibuat asal ada perasaan dan kemahuan pada tiap-tiap seorang umat Melayu. Saya bersedia menderma seringgit jika dijalankan syor ini. Mudah-mudahan dengan ini dapatlah kita memerentas satu jalan buntu yang dihadangi oleh umat Melayu pada hari ini yang membawa kepada kemajuan dan kemuliaan bangsa Melayu.

Syor ini besar harapan saya akan dapat sambutan daripada umat Melayu wasalam. Selamat Hari Raya kepada sekalian pembaca wasalam.

Selamat Hari Raya

Min Al-a'din Al-faizin Al-maqbulin

S O Bamadhaj
S.O. BAMADHAJ

(Kedai Baldu)

Singapore & Johore Bahru